



10. februar 2012

UPA 2012/131

Inatsisartut Suleriaasianni § 36 naapertorlugu apeqquteqaat aallavigalugu oqallinnissamut siunnersuut imaattoq matumuuna saqqummiuppara:

**Meeqquerivinniititsisarnerni angajoqqaat akiliutigisartagaasa sumi najugaqarneq apeqqutaalluni assigiinnginnerujussuisa qanoq iliornikkut aaqqiivigineqarsinnaanissaat pillugu apeqquteqaat aallavigalugu oqallinnissamik siunnersuut.**

(Inatsisartuni ilaasortaq Karl Lyberth, Siumut)

**Tuungavilersuut:**

Meeqquerivinniititsisarnerni angajoqqaat akiliutigisartagaat sumi najugaqarneq apeqqutaalluni assigiinngitsorujussuupput. Piffiit ilaanni meeqqerivinniititsisarnerni akiliut qaammammut 4.000 kr. pallillugu annertutigivoq, allanilu qaammammut akiliut annerpaamik 1.000 kr.-ulluni.

Meeqquerivinniititsisarnerni akiliutip annertussusaa apeqqutaalluni sinerissami ilaqutariit mikisunik meerallit atugaasa assigiinngippallaarnerat isumaqarpunga pissusissamisuumngitsoq iliuseqarfigisariaqartorlu.

Ilaqutariit mikisunik meerallit ilaqutariippassuartulli allatut pisussaaffippassuaqarneri eqqarsaatigalugit, aamma mikisunik meeraateqarneq akisoreeqimmat, isumaqarpunga pissusissamisoortoq Inatsisartunit aalajangerneqarpat meeqqerivinniititsisarnerni akiliutigisartakkap annertussusaa qummut killilerneqarpat, soorlu assersuutigalugu qaammammut akiliutip annerpaamik 2.000 kr.-unissaa aalajangiullugu.

Taamatut aalajangiisoqarneratigut meeqqerivinniititsisarnerni akiliutigitinneqartup ingasattumik assigiinnginnerujussua qaangerneqarsinnaavoq. Aamma tamatuma kingunerisaanik nunatsinni ilaqutariit mikisunik meerallit ulluinnarni atugaannit annertuumik ikiorserneqaannaratik assigiikannersumik atugaqalernerat anguneqassaaq.

Meeqquerivinniititsisarnerni akiliutip aalajangersimasumik qummut killilernissaanut Inatsisartut aalajangernerisa kingunerisaanik aningaasartuutaanerulertussat eqqarsaatigalugit aaqqiiniarnermi periarfissaapput kommunimut ataatsimoortumik tapiissutit aqutigalugit iluarsineq, imaluunniit meeqqerivinniititsisarnerni Namminersorlutik Oqartussaniit toqqaannartumik tapiisalerneq.

Meeqquerivinniititsisarnerni akit sumi najugaqarneq apeqqutaalluni assigiinngippallaarnerujussui aaqqiivigineqartariaqarluinnarmata, aamma piffiit ilaanni meeqqerivinniititsisarnerni akit annertuallaarujussuarmata, neriutigilluinnarpara ajornartorsiut pineqartoq pillugu partiit erseqqissumik isummessorumaartut, tamatumalu kingunerisaanik assigiinngitsunik arlalinnik aaqqiissutaasinnaasunik siunnersuutininik saqqummiussaqlutik.